

摘藻堂四庫全書薈要

集部

欽定四庫全書薈要卷一萬八千六百七

集部

御選明詩卷一百七

七言絕句七

陸深

春日雜興

綠楊如綫草如茵
紫竹肩輿白氎巾
不是為春禁不得
老來心緒最憐春

留別所知

世間好事一百一春日麗辰三月三此地故人還故國
他時江北望江南

和俞生暮春閨怨

落花庭院草萋萋雨鵲晴鳩各自啼倦繡一春長閉閣
忽將清夢過遼西

魚書欲寄轉多情錦字回文織不成落盡桃花飛燕子
一番風雨又清明

雨窓春興

水心亭館午風多別有長條許客過
無數落花紅作陣
一篙新雨綠生波

漫興

好山多在夕陽西十里清溪護石堤
臨水草堂春事晚
鑪香驚墮燕銜泥

滿蓑風雨楚江天釣得鱸魚不賣錢
十里溪橋趁歸路
酒壚茅屋背花眠

月明吹徹紫鸞簫火宿沈香暖未消
風送海潮來別浦

賣魚人過竹西橋

張邦奇

午風亭為序菴太史

青草池邊綠樹枝
晴空白日颺遊絲
湘簾半掩飛花入
正是午風吹客時

孟洋

回鴈峯

回鴈峯高起夕嵐
孤舟落日繫江潭
鴈知瘴癘愁南渡

逐客明朝路更南

殷雲霄

大堤詩

北堤楊柳綠絲烟更有桃花紅
可憐攜尊邀我南鄰去
美酒憐渠不索錢

漫興

二月澄江春水深
北孤山頭雲陰陰
北孤山頭雲作雨
我欲渡江愁我心

孫泰

西江道中

九月菰蒲色尚青芙蓉深淺漾沙汀一行新鴈從天落
我欲圖歸作畫屏

安磐

絕句二首

折竹聲乾萬壑虛晚風江上有歸漁間來只共梅花笑
雪裏何人到草廬

竹杖綸巾避俗翁
閉門終日坐高松
抱琴却是無彈處
流水高山一萬重

周宣

聚書樓

樓外長河練帶斜
河頭水氣欲蒸霞
誰家艇子捕魚過
衝落小桃一樹花

田登

巴東峽

晚泊孤舟春水生
遠灘雙棹片帆輕
消魂一覺鄉心夢
卧聽四山風雨聲

嚴嵩

送顧使君華玉赴全州

吳客孤帆楚水涯
碧雲千里度長沙
湘山獨夜看明月
莫聽猿聲便憶家

李夢陽

送人入蜀

錦江風高生夕波
蘆荻蕭蕭秋雁多
問爾鄉關何處是
巴人時唱下渝歌

暮春余莊

暇即來遊困即眠
玉杯長醉彩雲前
春風暮起楊花亂
疑是梁園雪裏天

送周判官

明鎧綠酒五花裘
客舍新秋螢火流
問君不飲真何事
明日出城風葉愁

夏口夜泊別友人

黃鶴樓前日欲低
漢陽城樹亂烏啼
孤舟夜泊東游客
恨殺長江不向西

別李生

華也南來送我行
青絲挈酒玉壺輕
滕王閣下江千尺
一曲滄浪萬古情

送王韜

王郎口談金虎文
自稱師是紫陽君
挂帆明日忽南去

影落龍江五色雲

京師春日漫興

十日不出花盡開
城南城北看花來
即教閉戶從花盡
莫遣看花不醉迴

汴中元夕二首

中山孺子倚新妝
鄭女燕姬獨擅場
齊唱憲王新樂府
金梁橋外月如霜

細雨春燈夜色新
酒樓花市不勝春
和風欲動千門月

醉殺東西南北人

何景明

溪上水新至漫興

溪上水生三尺深茅堂清夏氣蕭森
無錢即買扁舟至繫向門前柳樹陰

雙飛鷗鷺戀青莎對舞蜻蛉愛碧波
一夕水風開菡萏畫船齊唱採蓮歌

碧沙青泥俱可憐白鯁赤鯉不論錢
莫歎林翁生計拙

買船沽酒過年年

晚至昌平寺中

度盡青溪十里霜
寒蕪落日下蒼茫
山城薄酒無錢買
晚飯僧家石耳香

寫情

莫將錦瑟怨年華
柳絮飄零夢謝家
小院迴廊鎮春晝
何人來為掃庭花

送韓汝慶還關中

華岳雲臺萬里情
高秋落日眺秦城
黃河一線通滄海
身在仙人掌上行

秋日雜興六首

寒蜩啼斷槿園空
萬樹凋傷八月中
只有南山蒼桂在
一株花發向秋風

雨花風葉總堪憐
海燕江湖各渺然
莫向高樓空悵望
暮蟬多在夕陽邊

野亭千橘未全黃
青柿紅梨盡待霜
南鄰老翁種橡栗

已見兒童收滿牀

紫蔓青藤各一叢
野人籬落管西風
郊扉遠絕誰能到
秋日蟲鳴豆葉中

急杵繁沾一郡秋
西風落月萬家樓
不知塞下征人怨
但見閨中少婦愁

柏林楓岸迴宜看
楊柳芙蓉不禁寒
最愛高樓好明月
莫教長笛倚闌干

徐禎卿

送顧馬湖孔昭四首

巴東明月巴西歌
兩岸梅花羌笛多
一曲停橈雙淚落
猿聲三峽若為過

西上江陵北客哀
遙看巴路碧崔嵬
樹繞黃牛瞿峽轉
天橫劒閣蜀門開

錦水由來勝若耶
蘭橈三月汎桃花
巴兒見客能歌曲
蜀女明妝笑浣沙

成都酒樓高插天
烏帽來遊太白仙
他日燕州何處覓

星槎遙挂彩雲邊

桐廬瀨中

千峯詰曲夾松湍石激波縈走迅灘祇道孤帆天際轉
那知明月峽中看

將發夏口

鸚鵡洲邊生暮烟旅人南望思依然盡道巴陵湖水闊
秋風莫渡漢陽川

送客

春水瞿塘灩澦堆溶溶天際錦江回蜀客蘭橈唱歌發
千山樹色拂帆來

題談藝錄後三首

末世詩篇百態新五言蘇李等遺塵不知覆瓿銷沈處
枉却前朝幾許人

徐子談詩格儘高古風猶未滿劉曹文章草草沈公論
笑殺揚雄作反騷

浮論人人習齒牙連城趙璧墮泥沙阿卿掩抱千金橐

藏向名山自一家

書海棠扇

春風吹墮胭脂淚散作妖花一樹丹可奈五更清夢短
杜鵑聲歇雨絲寒

望行人二首

秋原迷望草芊芊幾樹荒鴉落照前驛使回時曾寄語
西風早晚度秦川

綠蕪平野暮天低遠色蒼蒼路不迷昨日鄰家歸後信

行人只隔灞陵西

偶見

深山曲路見桃花
馬上怱怱日欲斜
可奈玉鞭留不住
又銜春恨到天涯

歸自松陵

十里風帆日未斜
江城春晚見桃花
深深門巷無人過
燕子還隨客到家

次寶應

鴨羣無數夕陽邊蒲草平沙晚漲寬欲識澄明三萬頃
憑君湏上驛樓看

題扇

渺渺洞庭秋水闊扁舟搖動碧琉璃松陵不隔東南望
楓葉寒塘露酒旗

煎茶圖

惠山秋淨水泠泠煎具隨身挈小瓶欲點雲腴還按法
古藤花底閱茶經

濟上作

兩年為客逢秋節
千里孤舟濟水傍
忽見黃花倍惆悵
故園明日又重陽

邊貢

題扇寄壽春希尹

淮南花雨送春還
叢桂陰陰郡閣閒
自是劉安有仙骨
謫居猶近八公山

題美人

月宮秋冷桂團團。歲歲花開只自攀。共在人間說天上。

不知天上憶人間。

時外舅胡觀察謝政家居寄此通慰

夜宿太常官舍懷佐

咫尺東曹信渺然。別離何似路三千。松窓月色淮陰雨。
一夜愁心似隔年。

柳塘雜興

御溝東畔柳成林。一水盈盈十里陰。白馬青衫橋上客。
春來多少故園心。

康海

飲酒樂

碧椀金波窈窕歌
綠雲紅日醉顏酡
西風白石雙巖下
北鴈清霜奈夜何

和岐東許西夜歸之作

汧上行吟月下歸
露花涼透薜蘿衣
風流一似蘇門畫
直欠當年阮少微

王九思

秋夜宮詞

寶瑟瑤琴度錦鸞
碧樓朱殿映齊紈
水邊楊柳因風起
月下芙蓉帶露看

王廷相

潼關

天設潼關金隄城
中條華嶽拱西京
何時帝劈蒼龍峽
放與黃河一線行

春雨

燕子來時水繞臺尋芳欲試探春杯淙淙惱殺連朝雨
不放桃花及早開

奉同謝汝湖詠顧未齋梅花

冷蘂疎枝裊素霞每從冰雪散芳華不緣生意先春動
誰識江南第一花

清望閣

清望樓臺春色深琪花芳樹午陰陰流鶯自是多情物
日向君王送好音

送栗判仁甫

秋來送客思依依
酒罷斜陽悵獨歸
却怪不如南去鴈
馬頭相傍一行飛

朱應登

湘中雜興

湘渚草深鴨鵝鳴
湘江水清多芷蘅
月明伊軋中流槳
疑是湘娥鼓瑟聲

顧璘

移疾

秋至一月暑仍酷西風忽振庭梧飛白雨連山雲匝地
滿城兒女覓秋衣

陳沂

放內苑諸禽

多年調養在雕籠放出初飛失舊叢祇為恩深不能去
朝來還繞上陽宮

王韋

春草

帶雨和烟未可名
春風處處不勝情
於今南浦知多少
都向王孫去後生

孫一元

醉著

瓦瓶倒盡醉難醒
獨抱漁竿卧晚汀
風露滿身呼不起
一江流水夢中聽

席上偶成

楊花燕子弄春柔
醉倚筵簌笑未休
依舊清風明月好
買船吹笛過滄洲

林侍御過訪留坐竹下問武夷山水

清泉長日漱潺湲
易史裁冠訪竹關
自笑道人迂野性
相逢先問武夷山

憶王屋山人

幾時不見鹿皮翁
回首碧雲天自東
記得去秋新月夜
豈花棚下說年豐

宿江干

宿鳥不移林影靜
春旗猶颭晚風虛
城頭明月夜如水
江口小舟人打魚

晚泊江村

半江黃葉飛紅雨
萬里長天坐短艘
村酒瓦瓶呼渡急
石門山月去人高

竹莊為孫用彰題

小築閒莊枕水潯
繞牆種竹碧森森
亂紅吹盡春無幾

借看君家秋一林

梨花

露華時為洗鉛妝
剪剪輕風透越裳
深院無人吹玉笛
秋千斜搭月如霜

睡起效趙子昂

小窓酒醒夕陽低
草色撩人思欲迷
曳杖起來出門去
山櫻子落竹雞啼

秋夜渡江

西風吹鬢綠
鬢髮擊榜長
歌酒半酣野
月上船燈影
亂載將秋思
過江南

鄭善夫

南望湖

南望諸湖波
影空揚舠東
逐芰荷風垂
楊亂覆茅簷
綠好著魚梁
山照中

張瑄

平南烏江道中

山東平川小路斜不成村落兩三家分明橫幅桃源景
只欠溪流汎落花

王崇慶

暮春撥悶

繡簾小閣迴添愁綠徧長安芳杜洲花發未應春易老
東風燕子度紅樓

萬里雲山起夢愁風簾落日下銀鈎誰家吹笛滄洲外
一夜相思欲白頭

江城蒲草日芳菲
梅子青青尚未肥
自在柳花飛薄暮
輕盈白鳥下漁磯

夏日即事

窓外芭蕉欲放時
槐陰庭院晝遲遲
夜來風雨蕭條處
落盡薔薇第幾枝

周金

園蔬十詠

錄二首

波稜

清齋漫引龍池水自灌波稜出不遲却憶故園春雪裏
滿畦寒玉碧差差

萵苣

帶露和烟傍淺沙曉風吹茁碧雲霞高門縱有青絲手
不及江南處士家

少司馬蒲汀李公得江南紅梅二株置諸雙檜
堂邀予同賞是日設浴兒佳會於廳事匆遽不
獲往觀想像風致作絕句二十首

錄二首

隴頭音信春將半
江上風光臘已殘
唯有孤山二仙子
酒酣斜倚碧闌干

姑射山人冰玉姿
餐霞吸露綰妝遲
東風遣問春消息
點綴輕紅四五枝

冠天敘

題畫

十月梅花開已多
蹇驢衝雪野橋過
亦知金紫趨朝貴
奈此當前清興何

韓邦靖

漫成二首

漆沮河邊兩岸沙
繞堤十里盡桃花
春風縱使隨流水
落日猶堪鬪彩霞

沙苑烟光近白樓
黃河清渭兩交流
牛羊落日新丘壟
楊柳春風古渡頭

春興

十里晴烟散薜蘿
輕寒乍暖試清和
柳眉杏臉桃花淚

各有春愁誰最多

戴冠

贈甘惠州

四百雲峯面面開
使君花底放衙回
人生豈必二千石
只看羅浮也合來

寫扇頭

野老騎驢何處回
柴門日暮背江開
小窓春盡綠陰滿
雲黑不知山雨來

方豪

題畫

亂山兩岸一江橫
烟樹濛濛雨乍晴
釣艇自來還自去
江風不動水禽鳴

鴛鴦湖

鴛鴦湖邊落日明
荷花十里棹歌聲
丈人自折碧筒飲
醉看秦塘海月生

贈陳生

老農深住石溪傍
赤日蒙君過草堂
若問生涯無可答
梅天猶有晒書忙

胡纘宗

衡山涵峯胥臺見過次韵為謝

萬竹脩脩淨埽埃
瀛州仙子抱琴來
不知坐久雲生砌
況是鳥鳴花覆苔

丁奉

寄尤少卿宗暘

張翰歸時計亦疎
秋風寂寞始登塗
不思五月清江上
已有鯉魚勝玉鱸

錢琦

過滁州

江北滁南數日程
蕭蕭落木送秋聲
夕陽滿地鳥飛絕
人在亂山堆裏行

陸伸

河間道中

荒田殘雪啄飢鴉握粟謀炊野店家辛苦莫辭行路遠
冷風三日下午牛車

楊慎

于役江鄉歸經板橋

千里長征不憚遙解鞍明日問歸橈真如謝朓宣城路
南浦新林過板橋

毛園萃芳亭與沈中白丘月渚同賦

繚垣洞屋鎖烟霞五色離披百種花客子看來猶駐馬

主人何事不歸家

星回節

忽見庭花拆刺桐故園珍樹幾然紅
年年六月星回節
長在天涯客路中

聞笛

江樓寒笛起春聲蜀客扁舟萬里行
吹盡落梅還折柳
新春殘臘正關情

贈箏人

綺筵雕俎換新聲博取瓊花出玉英肯信博陵崔十四
平生願作樂中箏

中秋

四壁蛩吟白露團西園清夜為誰歡千家門閉中秋月
只有愁人獨自看

早春

江暖波光映日光幾家同住水雲鄉
槿籬茅舍繁花裏也有秋千出短牆

春望三首

春風先到海東頭
春興催人獨上樓
最是晚來凝望處
曲堤烟柳似皇州

滇海風多不起沙
汀洲新綠徧天涯
采芳亦有江南意
十里春波遠泛花

古岸新花金碧叢
昆池三百水烟通
梁王閣道青蕪國
漁父帆檣白鳥風

江陵舟中贈田李二子

落月寒沙夜未分
玉簫金管醉中聞
明朝回首沅江路
愁聽清猿和白雲

望中條山

征馬長鳴向北風
崢嶸關回首暮雲東
太行過盡中條出
路青山白雪中

費家

思家

春來發棹見春還
著盡寒裘憶夏紈
兒女在家頻記念

計程應說到長安

王道

過舊居有感

破屋頽垣是幾年
重來下馬一悽然
丁寧好護門前柳
曾繫詩人萬里船

汪玄錫

朝鴉

景陽鐘動曉鴉飛
漢殿千官拜玉墀
仙仗纔移東殿去

翩翩棲滿萬年枝

屠僑

雨夜泊塘棲

出關彌望凍雲低
畫鷁迎春未試題
四十五程燈火夜
一川風雨泊塘棲

徐咸

湖上

涌金門外水青青
倒浸西山似畫屏
十里暖風魚浪細

扁舟忽過望湖亭

常倫

玉清宮戲題

玉函金簡數行書
鶴背飄飄上碧虛
羣仙瑤殿收封事
應笑人間久謫居

林太輅

長沙道中

紅紫山中野草花
三湘愁髻倍年華
放臣消息春來好

月白千峯夢到家

李漁

寧武關

邊城無日不風沙
白草黃雲萬里賒
夜夜城頭聽戍篴
吹殘隴水又梅花

蔣山卿

金陵覽舊

小飲東山憶謝公
傲然攜妓醉春風
卽今桃李花間月

照入遊人尊酒中

劉氏水南亭子

洛水橋南學士家青林遙對碧山斜
春風細雨柴門閉
一樹鶯啼杏子花

郡齋五日柬劉子

郡齋五日思依依客裏清尊興自違
微雨隔簾人不見
滿庭蕉葉落花稀

薛蕙

雪

流風迴雪滿蓬萊
繡幕珠簾萬戶開
內殿平明催設宴
玉京深處翠華來

水巷沈沈夜漏稀
玉階寂寂雪花飛
空持紈扇歌瓊樹
愁對銀缸襞舞衣

苑外樓臺繞狹邪
雪中歌吹競繁華
麗人對舞明珠佩
俠客爭馳白鼻騮

一溪

一溪雲水一漁夫一曲滄浪酒一壺笑指桃花問春色
武陵得似此間無

溪濱

柴門咫尺即溪濱賦得新詩似寫真蒲芽短短桃花水
燕子飛飛楊柳春

山館

山館蕭條客到稀幽人閒暇坐披衣日長燕子丁寧語
風靜楊花自在飛

早春

樹梢紅潤水波明
新鳥啼多百轉聲
從此小園增物色
杖藜日日看春生

曉寒

洞門風急薜蘿斜
滿院疎桐洗露華
一榻曉寒難穩卧
道人賴是服朝霞

奉同王浚川海上雜歌

天雞啼處夜生潮
東望蓬萊翠霧消
紫貝高為雲外闕

青龍盤作日邊橋

地脈東南一線開
千流萬派幾時迴
恰從瑤圃峯頭去
又逐銀河天上來

方丈瀛洲一水傍
層城懸圃羽人鄉
青雲不散三花樹
丹露長零五色漿

石門雙闕入蓬瀛
日日惟看雲霧生
白蜃吹霓晴後見
翠蚪銜月夜中行

劉天民

宮詞

黃花細雨掩金鋪
罷却鍼工一事無
才報成雙又分去
人間博戲等撈捕

林春澤

竟達樓

青山高閣故人家
流水春深泛落花
欲問鹿門何處是
白雲相對葛巾斜

陳九川

題桃源圖

偶攜鄉里入山川一隔塵寰幾百年
世上祇言秦網密桃源也有不租田

舒芬

孤雲

一片孤雲逐漢飛東西終日竟何依
傍人莫道能為雨惟恨青山未得歸

夏言

苑中寓直記事四首

水風清透芰荷香，會景庭中捧御牀。
朱箔黃簾垂四面，銀燈寶炬列千行。

湧玉亭前放夜舟，碧荷香靜雨初收。
遙看北岸紅煙裏，水殿珠簾盡上鉤。

黃金盤子熟龍涎，波面風來香滿船。
銀燭光搖簾影細，水晶宮裏夜朝天。

新賜文舟汎碧瀾，扣舷容與得奇觀。
菱篙簇簇團花錦，

荷蓋亭亭翠玉盤

汪佃

苑口別意圖為弋陽李生題

秋來苑口漲初生
羨爾歸帆一片輕
折柳離亭休弄笛
客邊禁得斷腸聲

雨行

落花飛絮踏成泥
烟雨連纖日向西
行客正愁行不得
鷓鴣偏傍馬前啼

李士允

送施生還泗

梁孝臺前花正飛
玉壺攜酒送將歸
遊絲滿路留春色
不向離筵罨客衣

王漸逵

鐵橋

狂客山中不費招
瑤池春宴夜聞簫
醉餘不記歸時路
曾跨青羊過鐵橋

馬汝驥

寄題王司徒句曲山房

句曲冥冥入紫烟峰巒盤鬱大江前
山房卜築當奇勝可是華陽第幾仙

手種松枝節已長雪峯雲壑共蒼蒼
從教赤日行天急散髮清陰也自涼

金臺回首夢仙都粉署支頤閱畫圖
稍待功成還大隱不知猿鶴怨人無

汪應軫

書武陽驛

小驛春深屋半斜東風開到刺桐花
夜來有夢難分別半是長安半是家

曹弘

下夷陵

溪花丰茸溪雨涼雲水不分前路長
山鳥一聲山竹裂思君半夜發瀟湘

張治

春谷

晶晶晴雲芳草堆千花
萬花相映開東風吹雨入山閣
啼鳥一聲何處來

登石鍾山望廬山

廬嶽亭亭翠萬重
懸泉千尺挂飛龍
石鍾山下江如鏡
映出青天五老峯

送鍾時亭之南雍

霜落燕山萬木稀
君行歲晚欲何依
十年空獻君王策
猶向橋門著布衣

黃佐

旅夜

沈水煙銷膩燭黃
疎帷浮動月蒼蒼
棲鴉不避霜風惡
繞樹數深秋夜長

童承叙

曉渡玉河橋

百尺飛梁烟霧生雕闌玉竇綺羅行御溝月露生秋興
駐馬垂鞭聽水聲

張袞

寄樊僉憲一賢

同是三湘放逐臣歸來猶自厭風塵
長沙日落秋陰滿愁殺當時痛哭人

周祚

后峯

落日滄江返照來江光倒射碧山隈
山人愛聽楓林響月滿柴門未肯迴

教英

太岳紀遊

偶來雲卧紫霄宮露汎瑤臺月浸空
夜半星官朝北斗步虛聲在萬花中

輞川謁王右丞祠

蜀棧青驪不可攀孤臣無計出秦關
華清風雨蕭蕭夜

愁殺江南庾子山

別業漫興

門對寒江舊不斜
旋開三徑學陶家
秋來不問登高節
日日攜壺醉菊花

張含

春暮

春暮南溪花氣香
亂蜂驚蝶不成行
漁竿在手不須放
釣得鯉魚三尺長

汪本

春日睡起有懷張延毓評事

睡起西林日又曛
嚶嚶啼鳥隔窓聞
吳山越水人千里
楊柳桃花春八分

夜宿蘆潭

石尤風動駐征帆
千里孤光月正南
翹首故林天一角
水禽相伴宿蘆潭

春暮

轉壑穿林駕小車
瞳矐初日散平沙
春光恰似秋容淡
處處東風吹落花

舟中有成

故鄉南望渺無涯
水面雲深日又斜
欲問浮生何所似
試來風處看楊花

管浦

田家

豆花香暖木棉開
禾黍高低秀作堆
落日松風一尊酒

石壕無吏夜深來

顧彥夫

淮陰祠

淮陰城下弔王孫
心事昭昭不待論
一飯尚能酬漂母
後來何忍負君恩

董穀

宿靈壁連城鋪題

日暝鴉歸野色昏
解鞍投榻向荒村
欲聞清磬何由得

明月滿庭空閉門

縣出
磬石

文徵明

春日

茆屋泥香燕子飛
東風日暖谷鶯啼
游人漫自穿花柳
別有春光在竹西

秋日西齋

紈扇無聊髻怯風
芙蓉波冷月溶溶
不知秋色來多少
飄盡西齋一樹桐

晚晴

茆簷漠漠晚風微
曲院無人雨霽時
忽見碧窓疎影亂
一痕新月在花枝

濟上聞笛

關山不隔梅花夢
吹破鄉愁笛裏春
夜水不波殘月上
江湖多少未眠人

題畫

過雨空林萬壑奔
夕陽野色小橋分
春山何似秋山好

紅葉青山鎖白雲

天削芙蓉萬玉攢十分寒思屬吟鞍不知擁褐茆簷下
別有幽人冷眼看

近山千丈抵清漪遠樹連雲入望迷有約去登江上閣
風烟多在曲樓西

春日懷子重履約履仁

湖上花枝暖欲然寺前楊柳綠生烟憑君莫信春光早
寶積山頭有杜鵑

池上

單鳩喚雨雙鳩晴池上柳花縱復橫好風忽卷讀書幔
及君到時春水生

蔡羽

題雞鳴山房

山浮寒碧水浮花石壁蒼蒼竹樹斜愛爾玉京秋色好
白雲頭上看人家

湯珍

越溪柳

掠燕藏鶯覆碧潭
絲牽縷結弱難堪
可憐庾信多蕭瑟
猶想春風似漢南

城西游歸乘月泛舟由胥江至西虹橋

嬌歌宛轉醉花前
歸去蘭橈漾錦川
十里春城燈火接
月明樓閣萬家烟

涼夜

明河流影散雲霞
南斗離離北斗斜
月色露華涼似水

金螢飛墮玉簪花

懷湯張二子

改罷新詩獨自吟
憶君不至意沈沈
疎花對雨平闌靜
芳草和烟古巷深

潤州舟行作

河洲春茁紫蘆芽
綠水清輝弄客槎
十日南風吹未息
殘梅猶發短牆花

冬柳

大通街北竹橋西枯葉衰楊傍岸垂莫恨霜條今漸脫
春風吹綠只移時

張靈

對酒

隱隱江城玉漏催勸君更盡掌中杯高樓明月清歌夜
知是人生第幾回

題唐子畏畫卷

黃茅渚頭熨斗柄唐子好竒曾屢遊太湖烟景此絕勝

還許吾輩閒人收

王錡

邀祝秀才

嬾逐潘家榆柳塵扶攜看盡滿城春
醉來不唱梅花曲
自度新聲教玉人

卿月花燈徹夜明吟肩隨處倚傾城
明宵倘念孤寒客
共對芸窓一短檠

陳鐸

寫杏花自題絕句

晴團紅粉護春烟
彷彿江村二月天
記得景卿回首處
一枝斜插酒樓前

徐霖

題石睿學士圖

歸來廢馬踏堤沙
回首彤樓路漸賒
遙想禁門金鎖合
一庭月浸紫薇花

謝承舉

聞鴈

枕斷烟波曉夢餘
鴈聲悲切過匡廬
離人久望平安字
何事江東不寄書

蕪城道中

萬株楊柳萬株槐
斜日長淮凍未開
竹裏梅花尋不見
暗香飛過小橋來

牧龍亭雜詩

細風吹雨散還收
四月輕寒正麥秋
梅子已黃蠶已熟

滿村桑柘叫鉤輶

睡起

茶淪花磁洗睡魔
枕流亭上暮涼多
狂飈吹下西風雨
一片秋聲戀敗荷

題扇寄希仁

雪晴花暖忽離家
北去頻看鴈影斜
回首江南春漸老
東風開到紫荊花

四月十日過東山小莊漫興

林深樹杪挂藤花
石徑初來路覺賒
割盡黃雲農未了
棗桑陰裏鬪栽瓜

茅茨喔喔亂晨雞
紅日穿林樹影低
圍上軸聲驚打麥
黃鸝飛過綠陰啼

李潛夫畫

銀河無路泛仙槎
一舸空江此是家
殘月照人秋睡穩
不知清夢在蘆花

送鄧以敬

貂蟬家世舊王孫
西指濠梁是故園
雪霽四山狐兔出
笑攜弓矢獵平原

芭蕉

南園蕉長綠
陰深覆地重重十丈陰
獨自行吟還坐詠
不知涼思滿秋襟

金鑾

寄吳厚丘


黃金散作買花資
白首誰能戀故知
同作孟嘗門下客

西風吹髣獨歸時

感舊

北風吹雪暗江城
歲暮天涯共此情
試向尊前彈一曲
琵琶猶是別來聲

御選明詩卷一百七



總校官庶吉士臣侍朝

校對官編修臣莫瞻業

謄錄監生臣和其聲

欽定四庫全書薈要

集部

御選明詩卷二百八

詳校官原任主事臣李斯咏

欽定四庫全書薈要卷一萬八千六百八

集部

御選明詩卷一百八

七言絕句八

王寵

夜

山腰小閣夜焚香烟滿平林月滿牀十里春湖明滅外
竹枝歌散一天長

月

娟娟霜月夜寒侵宿莽澄湖入望深自笑山中雲卧客
一牀林影類棲禽

雨過

軒窓雨過綠交加山鵲羣飛噪晚霞爛漫一番春夢覺
東風時埽日南花

同王子美湖上看月

百尺星橋卧綵虹青天飛鏡水涵空憑君看盡人間月
誰似湖山枕簟中

戲簡補之與之

伏枕聞君樂事偏
鈿蟬金鴈總堪憐
何時共醉桃花塢
解盡春衣當酒錢

白雀返棹李王二子送余過虞山下作

隨山高下野人家
春下林深不斷花
可奈流鶯千百轉
陰陰綠樹映紅霞

朱樓紺宇鬱相參
倒影斜飛墮碧潭
落日畫船搖曳處
土風還自樂江南

張詩

候玉樵子

注酒攀花長候君
城邊芳草已斜曛
登樓數向西林望
只見青山擁白雲

程誥

送鄭思祈遊越

鏡水芙蓉五月花
聽歌知道越兒家
即看濤雪臨滄海
便挂樵風溯若耶

送芸上人

行盡春山翠萬重新林浦月坐聞鐘橫江東去長鳴鶴
巢寄南朝第幾松

徐定夫

唐詞

禁門秋草雨中生睡醒芙蓉小帳清幾日內廷宣喚少
紫薇花底學吹笙

徐充

題扇

綠樹陰中款竹扉
幾家臨水狎漁磯
日長門徑無車馬
燕子楊花自在飛

陳鑑

種菜

曉日園頭抱甕頻
滿衣寒氣露華勻
老夫一箸非容易
為語人間食肉人

姜玄

牧童

烟中草深黃犢肥
百舌繞身原上飛
斜陽幾處吹蘆笛
頭戴衣裳渡水歸

黃嘉仁

田家

烟含暝色入村場
一畝平田隔草堂
急雨初收新水滿
藕花香雜稻花香

張金

寓嶽祠

尋常不到山前路
洞口閒雲盡日封
時有聽經童子至
不知身是石潭龍

泊金閭

金閭門下燈火明
吳姬水調歌入城
曲終夜靜不知處
涼月滿船春水生

蔡圻

雨後即事

亂流東下晚霞生
破屋西邊落日明
卷盡墨雲山雨歇
出門扶杖看天晴

陳瀛

石林山房

輕風落樹散林烟
海日三竿正熟眠
傍午起來花落盡
不知雷雨過山田

顧文淵

晚發錢唐

潮平小棹發錢唐
俄頃飛帆過富陽
兩岸好山看不盡
數聲漁笛起滄浪

楊學禮

春興

菖蒲枸杞滿庭栽
書閣垂簾半掩開
蛺蝶不嫌春色淡
隔牆飛去又飛來

陳籥

寄訊

春風轉憶別衡廬
淮水茫茫老客居
却被故園兒女笑
至今猶作未歸書

陳宇

宜春舟次

客塗寂寞晚風寒
舟次宜春近石灘
苦竹叢深山鷓鴣
雨令人却憶鄭都官

園居

無事柴扉盡日間
嬾情幽興每相關
却嫌新笋都成竹

遮過門前半山

王瀛

韜光菴

吟邊喜與故人登老樹無枝石有稜坐久江潮聽漸近
寒山高出白雲層

余育

重過大梁坡臺廢寺有感

古寺無僧門半扃重來往事暗傷神一枝殘柳猶青眼

似識當年繫馬人

方廷璽

白水寺

石徑逢僧一話間
白雲深處不知還
松陰日午茶烟起
不有客來僧更閒

王磐

寄陳光哲

煮雪爐邊夜坐癡
踏青驢上曉行遲
不知多少相思味

換得春來兩髣絲

木公恕

自種柳

雙楊初種幾經春始見長條已拂塵
萬縷綠陰堪作帳一枝不許贈行人

冬日喜飲

暖閣熏香雪未晴淺斟膾炙舞茵橫
侍兒斜立朱幃下十指紅蠶弄錦箏

蘭廷瑞

夏日

終日憑闌對水鷗
園林長夏似深秋
槐龍細洒鶯黃雪
涼意萋萋風滿樓

蕭宗

香嚴寺詩

方丈香銷客未眠
出城頓覺夜如年
烏啼霜落僧歸院
雲滿空山月滿天

烏啼霜落夜漫漫風入疎櫺客枕寒
戍鼓敲殘雞亂唱
半軒明月照闌干

徐階

送賈元禎

江城漠漠柳絲輕
尊酒悠悠繫別情
一片春愁何處所
滿天風雨落花聲

張時徹

暮春

春日輝輝射碧流
春雲淡淡匝平疇
農夫荷鋤出門去
脈脈柳花飛上頭

詠竹

山陰誰種碧琳琅
日日春風繞畫堂
海上月明吹玉笛
令人錯認是瀟湘

朱廷立

杜宇

愁烟積雨過芳辰
乍喜濃陰綠樹新
杜宇多情啼不歇

山中可有未歸人

吳鵬

舟行雜詠

山花瑣細簇郵亭
小艇漁歸水氣腥
一路東風嘶去馬
土墻斜飈酒旗青

陸銓

清明

清明日薄晝陰陰
籬外新秧短似鍼
縛草象人田畔立

借他風力逐飛禽

高叔嗣

定州道中

夾岸新楊映廣津
客行無緒獨愁人
故園亦有千頭樹
二月中旬返水濱

朱泚

草堂前芙蓉正吐口占

清霜一夜老蒹葭
墻角芙蓉漸著花
猶憶昔年江上看

西風吹夢客思家

豐坊

梔子花題畫

金鴨香銷夏日長
拋書高卧北窓涼
曉來驟雨山頭過
梔子花開滿院香

雪夜過西湖南屏山

千巖萬壑玉層層
夜半山腰見佛燈
竹影埽窓塵不到
滿牀風雪定中僧

龔用卿

題畫

獨向江頭坐釣磯
浮嵐空翠點春衣
臨流回首看歸鳥
高樹無風山葉飛

蘓祐

砌草

細草青青尚凍痕
鄉園萬里怨王孫
憶乘款段晴原望
綠滿長堤過遠村

擬古宮詞

水殿涼生獨不眠
風來忽謾鳳笙傳
尋常門月娟娟夜
似向今宵分外圓

夜雨空堦靜自鳴
夢回枕上太分明
蕭蕭幾片芭蕉葉
故起秋聲滿鳳城

西苑新開避暑宮
水晶團殿敞簾櫳
鴛鴦自向池邊起
飛入橋西浦澍中

霜葉飄紅覆紫苔
嬾絨幽怨向人開
御溝水去曾相謝

流到人間竟不迴

陸粲

送汪僉事之湖南

驄馬長鳴飲碧流
花銀鏤帶鷓鴣裘
行人大別山頭望
雲外雙旌下鄂州

送人入蜀

樓船捩柁浪花生
百丈雙牽黛色明
夾岸兒童齊笑語
嘉陵江似使君清

陸采

春遊虎丘

閶闔東風萬柳柔
家家絃吹水西樓
蘭橈夜逐桃花浪
明月歌殘下武丘

范言

曉發吳江

垂虹橋邊曙色微
三高祠下露華晞
畫船打鼓出門去
秋水滿江鴻鴈飛

趙時春

春江行客

萬里春風客未休
歸心日夜水東流
不知身卧白雲上
更傍人家綠草洲

郊山半霽

山色平分翠欲鋪
烟光水氣半天無
老農荷笠驅牛晚
別作人間一畫圖

王慎中

滄洲道中寄蔡道卿

泠泠風舉碧羅裳一曲焦桐月在牀
寂歷寒波兼墜葉不知何處是瀟湘

馮恩

江頭夕望

秋林返照散孤烟秋水涵虛混碧天
飛盡寒鴉江漠漠青山一點白雲邊

雨中送客之蜀

一片寒雲樹杪生，旋飛秋雨佐江聲。
糝糊不識巴山路，聽得猿啼是客程。

雨花臺

徙倚高臺對寂寥，尊前飛葉帶霜飄。
秋霞映水明雙闕，暮靄連山鎖六朝。

羅洪先

後園續詠

棠梨花開深淺黃，燕子初飛日漸長。
草亭坐久客不到，

半雨半風春太狂

唐順之

古北口

諸城皆在山之坳此山冠城如鳥巢到此令人思勇士
天山萬里鳴弓弰

李開先

秋深村況三首

農休事簡人多醉風靜秋深蟲獨喧城市自然閒客少

過時不見款柴門

近郊誰復是良朋
一半山人一半僧
落葉滿階風自掃
危樓乘興月同登

天氣秋高正次寒
海風雖急不終朝
幾畦叢菊如雲爛
兩岸蘆花似雪飄

贈致政司諫劉後峯

人散燈殘睡正濃
驚回曉夢思重重
攬衣欹枕從容聽
野店雞聲野寺鐘

蔡雲程

登雷港驛樓

空江返照映孤洲
晚泊聊登驛外樓
可歎羈懷無住著
挂帆隨月下舒州

鄭大同

天游觀

輕輿斜日上高峯
瘦竹疎花萬壑風
獨鶴一聲松影亂
月明人在白雲中

楊祐

簡田長官

矯矯田郎三輔賢
省曹播越五經年
河洲水竹新開郡
暇日間看沙鷺眠

栗應麟

興武營暮春感懷

邊雲漠漠點征衣
飲馬長城帳未歸
春色不堪愁裏盡
楊花又向客中飛

蔡靈

送李樂菴赴池州司訓

依依楊柳暫停驂
別酒何時盡日酣
此後相思成遠夢
定隨明月到江南

蔡汝楠

小橋道中即事

茅茨帶壑兩三家
火種人歸石徑斜
行值深山小春候
女郎祠下半巖花

將出峽立夏前作

蜀江雲裏喚鈎輶，幾片殘花萬樹稠。
未換征衣逢入夏，一年春事在行舟。

林應亮

春陰

不見飛花上客衣，無端春色又霏微。
輕寒猶帶東風雪，只道楊花繞砌飛。

蘓志皋

送楊虛樓還任饒陽

淡烟疎雨禁城秋
彰義門前古渡頭
欲把相思付流水
蘆溝日夜總悠悠

顧存仁

對月

清光此夕為誰秋
關月能禁故國愁
何處笛聲吹不斷
卧看北斗挂城樓

周復俊

遵化道中

草自含烟水自流
曉輿寒日共林丘
雲飛不隔來時路
行盡青山是薊州

雨中望桃川宮

烟輕雲淡雨冥濛
無數鶯聲亂竹中
回首桃川知不遠
飛花隨水出牆東

王梅

南津

南津津頭春水新
草堂滉漾搖青蘋
漁歌官官遠山碧
時有鷓鴣飛近人

桑喬

流水

江流九派是潯陽
山勢千重擁建康
日暮雲帆看不見
夢隨江水過橫塘

包節

贈俠少年

早隨飛將戰龍沙日晚收營過狹斜下馬直趨盧女肆
滿樓喧笑擁琵琶

謝少南

府江雜詩

蠻烟不雨似雲濃白日陰陰慘淡中炎氣薰人冬亦暖
不知何地候春風

冬炎卉木未蕭條暫倚蓬窓旅況銷樹架綠垂君子蔓
崖林紅破美人蕉

王畿

游石堂菴次白玉蟾舊韵

扁舟泊向九溪灣
青壁迢迢過石關
可是王猷餘興在
隔林啼鳥下秋山

白悅

潞河

高秋鴻鴈向南征
江上那堪忽數聲
弟妹遙憐共相憶
坐看涼月下孤城

趙伊

案山

沙圩塔前春草齊
案山樓外曉鶯啼
畫船載酒三湖徧
簫鼓聲中日又西

王瑛

任丘道中寓目

萬山秋色送行鞚
高樹雲生欲暮天
可是河頭漁艇出
鷺鷥驚起水西田

王廷幹

春雨登樓

吳中羈客感年華
江上風流勝習家
向圃輕烟含柳樹
隔簾疎雨溼梅花

趙貞吉

夜宿蘓長公洗墨池亭戲作

江空草綠酒旗風
半醉黃州烟雨中
五百年前曾洗墨
依稀猶記雪堂東

釣漁臺

醉骨烟雲艇慢開
半竿風雨上漁臺
無人知是寒山子
明月吹簫呼未回

春望

杖藜到處立蒼茫
兩脚青山老法幢
飛去白雲何處住
一蓑烟雨下吳江

尹臺

光山逢劉唐巖副使

十年芳草惜離羣
海上朱旛隱暮雲
何意歸舟停楚澤
萬山黃葉獨逢君

靳學顏

即事

片片輕鷗淥水涯
隔溪楊柳是誰家
主人有酒不招客
可惜滿林紅杏花

王維楨

過望兒山

雲去臺高草色斑
居人為指望兒山
忽思遊子千峯裏
白髮當門暮未關

駱文盛

元宵宴康礪峯太史宅次韻

東風池館雪消遲
雪色燈光映酒時
夜半醉歸河上路
馬頭明月正相宜

陳鳳

藕花居

十里蓮花過眼新
水風猶自起香塵
明年還約看花侶
來喚湖邊雪藕人

牛恒

周藩宮詞

蕭蕭修竹映池寒
分汲銀瓶灌牡丹
報到花朝開內宴
競持金剪繞朱闌

夜來行樂鴈池頭
侍女分行秉燭遊
唱徹憲王新樂府
不知明月下樊樓

施峻

寄王屋張山人玄超

隱隱苑堂鎖白雲
萬峯飛瀑靜中聞
徵君只在東西崦
碧樹叢深路不分

喻時

看舞

紅娥婉婉柳纖纖
半拂蘭屏半拂簾
舞罷不妨迴笑口
一杯送到月窺簷

王健

懺閣阻雨

危崖側轉路千重懺閣登臨坐午鐘
可是潭龍來聽法
半山香雨忽濛濛

題湖南處士卷

湖南結屋水雲間十里平湖抱岸還
日落沙明開玉鏡
芙蓉倒浸郭公山

沈鍊

送朱子南還

十年辛苦在京華夢裏何時不見家
一到若耶溪畔月始知楊柳隔天涯

寄張有功

邊城楊柳路傍垂折取長條欲贈誰
不若寄將明鏡去為曾照我髣如絲

沈啓

黔陽舟中

黔陽春草碧雲齊萬疊青山萬曲溪
久客不禁鄉土思
半牆殘月子規啼

王問

春山獨步

春深原樹綠初齊
山擁芙蓉水漫溪
獨自攜筇上山去
小亭猶在萬峯西

春日江上別梅屋

改歲桃開楊子津
蔡家洲上獨傷神
客懷欲向愁中盡

又折殘花別故人

陸樹聲

白鷺洲

白鷺洲邊建業城
幾經攀折柳條生
行人莫漫輕離別
聽唱陽關第四聲

殷邁

六月六日避暑佛殿讀書

獨抱遺經坐上方
諸天風度葛衣涼
蟬鳴草樹半山靜

松落雲花合殿香

董份

山居即事二首

幽居綠樹自成村
更傍清溪日灌園
聽盡啼鶯人寂寂
數峯深處閉閒門

白雲青靄路難窮
萬壑千山一徑通
野寺林深不知處
磬聲遙在夕陽中

謝東山

次雲屏九日韻

海門孤嶼湧中流，千古龍祠在上頭。
記得雙旌蒼水使，春風一舸下渝州。

趙鈇

蒲圻道中

百疊青山野霧橫，迂迴何異輞川行。
可憐松老高千尺，不作風聲作雨聲。

燈下海棠

醉後移檠看海棠嬌姿如醉半依牆無端驚起花間蝶
飛撲銀缸亂晚妝

胡安

衡嶽雜興

幽泉自注石崖銷度壑寒雲去未遥松畔茯苓無處劖
倒騎黃犢自吹簫

湘江雜興

百丈牽風浪作山別情何必恨陽關蕭蕭客坐依燈影

知是瀟湘夜雨間

有感

樗櫟材庸歲月深
松筠避地竟何心
託根空向高岡上
祇作溪園數畝陰

客窓雜興

酒渴呼童汲井華
借眠苔徑月初斜
小窓紅葉時飛下
誤作春風送落花

劉鳳

芙蓉樓送客

醉酒高樓此別君
袖中萱草惜斜曛
月明水上如相憶
寄取瀟湘數片雲

朱曰藩

湖上送友人還吳門

湖上桃花瞥眼嬌
鴟夷舟穩卧吹簫
誰能載得西施去
却弄吳王送女潮

枕流橋避暑口號

竹牀花簟坐蕭閒好似儂家銷夏灣誰道屏風無九疊
彩雲飛作洞庭山

羅汝芳

曠覽亭

姑山亭子對江澄秋盡天風夜不生江上千山萬山月
淡烟收與浪痕平

楊巍

憶舊有感

丁卯橋西憶舊遊
綠楊高映酒家樓
故人莫訝凋零盡
一別江南四十秋

楊繼盛

遊卧龍山寺

出門已覺精神爽
況復陽回宇宙清
野樹含烟迷寺迥
晴山披雪倚雲明

懷鶴峯東城因寄

屋梁落月應懷我
春草池塘更夢誰
記得別時懸淚眼

佯為笑語怕相思

沈淮

積雨不能出有懷湖上

霞樓月榭欲生塵水上烟雲積幾旬
滿地山花應笑我雨中春色屬他人

周思兼

送林雙池

故鄉故人今別離春風春草各天涯
尊前相對惟今日

去後相逢知幾時

劉應時

過煉山

春風深樹語流鶯
綠滿河洲芳草生
立馬郵亭看題壁
誰能不動故山情

清澗道中

坡陁田地一二畝
土窟人烟三四家
村犬不知何事吠
午雞還上野桃花

傳夏器

東齋即景

昨夜東風上柳條
萬山明媚雪山消
白雲不解春中意
一片清陰引寂寥

亢思謙

禮弟瀕行餞席偶成

匹馬關山路逶迤
他鄉分手不勝悲
今朝綠酒愁看汝
來日黃花共阿誰

徐學謨

次真州始見雨

前旌衝雪下燕臺一路愁雲鎖不開
纔近江南春意動風吹微雨過江來

代倩送髮禪君讀書婁城

君去西江儂在東江頭日日有東風
東風縱便書難寄一枕春愁細雨中

劉效祖

九日獨酌

南山遙對菊花開
欲採無人為舉杯
縱說柴桑貧謝客
何曾不許白衣來

陳宗虞

送胡生南歸

揚子江風落暮潮
瓜州夜月起蘭橈
西湖歸去三千里
家在芙蓉第一橋

陳柏

送正卿弟之黎平

匹馬迢迢渡五溪
雙旌遙指夜郎西
莫憎遠道猶千里
隨處花開更鳥啼

曹梅

沅州道中

亂山盤錯入沅州
瘴雨蠻烟動客愁
回首燕南家萬里
斜陽誰倚故園樓

孫應鰲

華山雜詠

玉女窓開眼倍明
仙童肅隊奏鸞笙
海雲初散蓬萊殿
人在蒼龍背上行

王一鶚

三月晦日

花外東風送馬蹄
平原一望草萋萋
黃鸝苦欲留春住
深樹斜陽到處啼

李蓑

送人之岳州

與君酌酒酌春花
征馬蕭蕭鴈影斜
明到岳陽樓上望
斷雲殘雨各天涯

初宿海會寺

靈泉流水夜淙淙
月小松高鶴影雙
石榻覺來秋燭冷
誦經聲滿碧山窓

戲題

一自封書別建章
荷衣常惹蕊珠香
逢人白眼唱歌去

笑入西坡秋水長

盛周

蔡見麓過夜坐

南浦停車暝色催
故人相見且銜杯
月明何處吹長笛
落盡空山幾樹梅

王可大

宮詞

承明殿裏諫章來
封事君王次第開
此日昇平邊圉靜

日斜猶自在平臺

史起蟄

江上

溪雲窈窕海天晴
檻外江流似掌平
午夢醒來無一事
水雲亭上看潮生

胡直

聞鶯懷鄒繼甫

旭日高槐啼欲斷
午風深竹弄還長
莫言絕域如天外

猶有鶯聲似省廊

姚汝循

柏坊驛題壁

風雨蕭蕭滯客程
荒亭獨宿峭寒生
今宵羈思知多少
聽盡千山墮葉聲

回鴈峯

回鴈峯頭望帝京
寒雲黯黯不勝情
賈生已道長沙遠
今過長沙又幾程

鄭洛

冬夜獨坐

天涯歲暮夜淒淒
鼓角初傳月已低
一榻悠然成獨坐
不知身寄玉關西

張祥鳶

省中齋居

初聞晝漏報升衙
退食從容日未斜
閒訪同心過別署
笑看馴鳥啄庭花

城闕沈沈禁漏遲攬衣起視夜何其滿庭涼月詩懷愜
一樹清風鶴夢知

春晴閣坐

翠烟輕織柳絲低綠野平鋪草色齊為賞新晴登小閣
半村斜日杏花西

申時行

中秋病懷

石湖秋水浸蒹葭曾著仙人貫月槎萬里一輪偏此夕

不知清興落誰家

薄帷孤枕不成眠
一失清光便隔年
為語素娥長好在
莫教三五背人圓

茅亭對菊

冷豔疎枝濯素秋
結茅相對轉清幽
摘來自喜簪蓬鬢
只恐黃花笑白頭

金英佳色逐人來
未到重陽已爛開
且為歲寒留晚節
滿城風雨莫相催

鄭履淳

春閨

朝來靈鵲繞簷鳴
果得雲箋慰遠情
但說別來長見憶
歸期依舊不分明

穆文熙

送葉龍塘道長謫邵陽

重來燕市蹋紅塵
驄馬憐君氣象新
一疏即看成遠別
寒風冷雨入三秦

山家

迤邐荆扉鎖暮霞
潺湲澗溜繞籬斜
山翁不解春來去
獨立斜陽數落花

林如楚

曲江夜泊

西風吹散白蘋秋
野寺鐘鳴江霧流
夜半猿聲聽不盡
蕭蕭山月照孤舟

劍浦

劍浦城頭落暝烟
蓼花飛浪下灘前
笳聲月色沙汀外
無限西風送客船

旅宿新秋

露颭高梧一葉輕
月殘金井轆轤聲
不知歸興緣何事
夜夜雲山夢裏行

陳文燭

寄懷家叔時官黎平

音書南望暮雲低
官舍蕭蕭對五溪
衡鴈北來飛又盡

不知曾過夜郎西

歸有光

李廉甫憲副書齋小酌

青燈夜雨十年前今日書齋各黯然不是故人無舊話
淒涼只說楚江邊

隆慶二年朝京師南還與宣平俞宜黃武進陸
太學同舟贈絕句一首

褰帷初識龔黃面傾蓋尋參李郭舟去路不知春欲暮

桃花飛盡過揚州

初發白河

邊風刮地起黃沙三月長安不見花
却憶故鄉風景好
櫻桃初熟正還家

袁尊尼

送長兄再入留都

雲陽郭外草萋萋作陣楊花路欲迷
幾樹黃鶯啼不歇
行人回首晉陵西

許相卿

月林僧舍

月午天霜破衲寒
梵音蕭颯度林端
經殘香燼秋寥泐
時有風枝語夜闌

金山吞海亭

江面峯頭巧著亭
澄波玉宇兩爭清
倚闌客子心如水
何事沙鷗亦浪驚

皇甫洙

河陽馬上看江寄謝司直

秋空立馬大江堤
天畔雲山望欲迷
何事愁心學潮水
朝朝暮暮秣陵西

金陵絕句

長干已過落花辰
滿地楊花不見春
強折垂楊送歸客
勞勞亭畔共沾巾

皇甫汈

對月荅子浚兄見懷諸弟之作

南北何如漢二京
迢迢吳越兩鄉情
謝家樓上清秋月
分作關山幾處明

過北川橋舊寓

客舍依然禁籞西
女牆淮月古青溪
春風為笑堂前燕
門外何曾識馬蹄

夜過張子不值

偶隨明月過君家
幽徑無人自落花
書帙亂拋青玉案
尚餘螢火挂窓紗

次子約荅賓

閉戶無營嬾自宜
逃名漸覺少人知
相逢陌上休相問
二陸今非入洛時

馮惟訥

昆陵舟中夜別萬吳二明府次俞汝成韻

渡口雲深樹色蒼
孤舟寒雨共離觴
憑君莫話從前事
只是無言已斷腸

再別徐少初明府

悲歌昨夜惜離羣
九曲腸隨別路分
江雨未休春寂寂
那堪今日又逢君

卜大順

鄧尉探梅

日斜游倦宿湖干
一望苔枝湧翠巒
午夜月明涼似水
船頭獨坐不知寒

侯一元

甲戌七夕作

靈匹經年悵已違佳期此夕儼相依悲歡轉首成陳迹
明日橋邊鵲又飛

魏學禮

和章憲副豔詩

翠館雲樓花欲晴新妝初就曉鸞驚莫愁艇子知何處
露溼衣香到月明

栗應宏

宮詞

鳳凰樓下散宮花
金錯裁成五色霞
空有青春寄刀剪
不如紅葉到人家

高岱

省中

蕭蕭竹徑暝烟浮
散帙鳴琴事事幽
若比瀟湘漁父隱
門前只少木蘭舟

何良俊

乙卯八月余觴客青溪之上
坐有李節鳴箏質

山詠二絕句次其韻

虛館鳴箏秋正清
傳絃掩抑最關情
當年愛殺桓司馬
賞會由來是此聲

哀音裊裊出重幃
羈客僂僂思欲飛
絃滑酒香花正好
不辭零露夜沾衣

聽李節彈箏和文文水韻

汨汨寒泉瀉玉箏
泠泠標格映清冰
愁中為鼓秋風曲
不負移家住秣陵

春日皇甫司勳見過余出小鬟以箏琶侑觴司
勳為賦三絕句率爾奉荅

燈下曾觀舞麗華小庭亦復沸箏琶近來此樂無人解
獨有牛家與白家

白傳集有與牛奇章
妓池上台樂之作

歌珠歷落本清圓更遣流泉亂拂絃好取使君留一顧
故將誤曲唱當筵

簾同夏亶真成陋牀類楊褒亦太寒不是窈娘容絕世

何妨日日借人看

夏侯亶性節儉有妓妾數十人無被
服姿容客至常隔簾奏樂時呼簾為

夏侯妓衣 揚褒家甚貧然好音樂家畜聲妓
數人歐陽公贈之詩有三脚木牀坐調曲之句

文嘉

石湖絕句和王履吉

鷓鴣鵲鵲滿晴沙紅杏天桃亂著花
十里湖山開畫障
一雙小艇載琵琶

題畫二首

清絕倪迂未易攀能將水墨繼荆關
疎枝斜日茅亭外
一片江南雨後山

沈香烟煖碧窓紗綠柳陰分夏日斜夢覺只聞鈴索響
不知山鳥啄枇杷

蘇濂

絕句

新笋抽林與屋齊紅飛過畫闌西流鶯定惜春將去
坐向綠陰深處啼

蘇澹

清明日偶述

梨花寂寂燕飄零
藥檻蘭畦嫩葉生
處處兒童吹柳笛
扶持春事到清明

背面美人二首

抱得琵琶下玉除
湖山背立溜犀梳
傍人欲見春風面
但道蕭郎有寄書

釵軀烏雲髻欲蓬
回身環佩響丁東
背人不是無情思
自古紅顏畏畫工

張鳳翼

梨花

重門寂寂鎖香雲
雨滴空堦坐夜分
老去微之風調在
折來何處與雙文

暮春感懷

野花開徧又殘春
買擢攜尊好及辰
待得向平昏嫁畢
青山應笑白頭人

張獻翼

七夕同趙今燕賦

翠帳紅妝送客亭佳人眉黛遠山青試從天上看河漢
今夜應無織女星

紀遊

銀河耿耿夜迢迢月滿關山旅鴈高明日孤帆去何處
秣陵秋色廣陵濤

李攀龍

留別吳舍人

薊門春色送歸愁楚客思家屬倦遊借問何人賦搖落

白雲依舊洞庭秋

寄元美

薊門城上月婆婆玉笛誰為出塞歌
君自客中聽不得
秋風吹落小黃河

徐汝思見過林亭

五柳陰陰逼酒清一杯須見故人情
明朝馬上聽黃鳥
不似尊前喚友聲

早夏示殿卿二首

長夏園林黃鳥來
百花春酒復新開
人生把酒聽黃鳥
黃鳥一聲酒一杯

湖上青山繞屋斜
蕭條重枉使君車
到來縱遣柴門閉
只在東鄰賣酒家

郡齋同元美賦得橋字


山色秋停使者輶
孤城何處不蕭條
請看襄子宮前水
依舊東流豫讓橋

贈梁伯龍

太華峯頭玉女壇別時明月滿長安不知秋色今多少
君到仙人掌上看



御選明詩卷一百八



總校官庶吉士臣侍朝

校對官編修臣莫瞻菴

謄錄監生臣和其聲